

大佛頂首楞嚴經 卷十

①四明行陰境^{分三}

己四 行陰禪境魔事

②一總示陰相^{分四}

庚一 總明

③一結前想陰盡相

阿難！彼善男子修三摩提想陰盡者，是人平常夢想銷滅，寤寐恒一，覺明虛靜猶如晴空，無復麤重前塵影事。觀諸世間大地山河如鏡鑑明，來無所黏，過無蹤跡。虛受照應，了罔陳習，唯一精真。

④二正示行陰區宇

生滅根元從此披露，見諸十方十二衆生畢殫其類。雖未通其各命由緒，見同生基。猶如野馬熠熠清擾，爲浮根塵究

竟樞穴。此則名為行陰區宇。

⊙三懸示行陰盡相

若此清擾熠熠元性，性入元澄，一澄元習，如波瀾滅，化為澄水，名行陰盡。是人則能超眾生濁。

⊙四結示本惟妄想

觀其所由，幽隱妄想以為其本。

庚二別明發相分十

庚一詳辨分十

辛一計二無因

辛一一無因論

阿難當知！是得正知奢摩他中諸善男子，凝明正心，十類天魔不得其便，方得精研窮生類本。於本類中生元露者，觀彼幽清圓擾動元。於圓元中起計度者，是人墜入二無因論：

一者，是人見本無因。何以故？是人既得生機全破，乘於眼根八百功德，見八萬劫所有眾生業流灣環。死此生彼。祇見眾生輪迴其處，八萬劫外冥無所觀。便作是解：此等世間十方眾生，八萬劫來無因自有。由此計度，亡正徧知，墮落外道，惑菩提性。

二者，是人見末無因。何以故？是人於生既見其根，知人生人，悟鳥生鳥，鳥從來黑，鵠從來白，人天本豎，畜生本橫，白非洗成，黑非染造。從八萬劫無復改移，今盡此形亦復如是。而我本來不見菩提，云何更有成菩提事？當知今日一切物象皆本無因。由此計度，亡正徧知，墮落外道，惑菩提性。

是則名為第一外道，立無因論。

⊗二計四徧常

辛二 四徧常論

阿難！是三摩中諸善男子，凝明正心，魔不得便；窮生類本，觀彼幽清常擾動元，於圓常中起計度者，是人墜入四徧常論：

一者，是人窮心境性，二處無因；修習能知二萬劫中十方衆生所有生滅，咸皆循環，不會散失，計以為常。

二者，是人窮四大元，四性常住；修習能知四萬劫中十方衆生所有生滅，咸皆體恒，不會散失，計以為常。

三者，是人窮盡六根末那執受，心意識中本元由處，性常恒故；修習能知八萬劫中一切衆生循環不失本來常住，窮不失性，計以為常。

四者，是人既盡想元，生理更無流止運轉，生滅想心今已

永滅，理中自然成不生滅，因心所度計以為常。

由此計常，亡正徧知，墮落外道，惑菩提性。是則名為第二外道，立圓常論。

⊗三計一分常

辛三 一分常論

又三摩中諸善男子，堅凝正心，魔不得便；窮生類本，觀彼幽清常擾動元，於自他中起計度者，是人墜入四顛倒見，一分無常，一分常論：

一者，是人觀妙明心徧十方界，湛然以為究竟神我。從是則計我徧十方，凝明不動。一切衆生於我心中自生自死，則我心性名之為常，彼生滅者真無常性。

二者，是不觀其心，徧觀十方恒沙國土，見劫壞處名為究竟無常種性，劫不壞處名究竟常。

三者，是人別觀我心，精細微密，猶如微塵，流轉十方，性無移改，能令此身即生即滅。其不壞性名我性常，一切死生從我流出名無常性。

四者，是人知想陰盡，見行陰流，行陰常流計為常性，色受想等今已滅盡名為無常。

由此計度一分無常一分常故，墮落外道，惑菩提性。是則名為第三外道，一分常論。

⊙四計四有邊

辛四 四有邊論

又三摩中諸善男子，堅凝正心，魔不得便，窮生類本，觀彼幽清常擾動元，於分位中生計度者，是人墜入四有邊論

一者，是人心計生元流用不息，計過未者名為有邊，計相

續心名為無邊。

二者，是人觀八萬劫則見衆生，八萬劫前寂無聞見。無聞見處名為無邊，有衆生處名為有邊。

三者，是人計我徧知，得無邊性，彼一切人現我知中，我會不知彼之知性，名彼不得無邊之心，但有邊性。

四者，是人窮行陰空，以其所見心路籌度一切衆生一身之中，計其咸皆半生半滅。明其世界一切所有，一半有邊一半無邊。

由此計度有邊無邊，墮落外道，惑菩提性。是則名為第四外道，立有邊論。

⊙五計四矯亂

辛五 徧計虛論

又三摩中諸善男子，堅凝正心，魔不得便，窮生類本，觀

彼幽清常擾動元，於知見中生計度者，是人墜入四種顛倒——不死矯亂·徧計虛論：

一者，是人觀變化元，見遷流處名之爲變，見相續處名之爲恒；見所見處名之爲生，不見見處名之爲滅；相續之因·性不斷處·名之爲增，正相續中·中所離處·名之爲減；各各生處名之爲有，互互亡處名之爲無。以理都觀，用心別見。有求法人來問其義，答言：我今亦生亦滅，亦有亦無，亦增亦減。於一切時皆亂其語，令彼前人遺失章句。

二者，是人諦觀其心·互互無處，因無得證。有人來問，唯答一字，但言其「無」。除「無」之餘，無所言說。

三者，是人諦觀其心·各各有處，因有得證。有人來問，

唯答一字，但言其「是」，除「是」之餘，無所言說。

四者，是人有無俱見，其境枝故·其心亦亂。有人來問，答言：亦有即是亦無，亦無之中不是亦有。

一切矯亂，無容窮詰。

由此計度矯亂虛無，墮落外道，惑菩提性。

是則名爲第五外道，四顛倒性——不死矯亂·徧計虛論。

⊕六計十六有相

辛六 死後有相

又三摩中諸善男子，堅凝正心，魔不得便；窮生類本，觀彼幽清常擾動元，於無盡流生計度者，是人墜入死後有相·發心顛倒。或自固身·云色是我，或見我圓·含徧國土·云我有色，或彼前緣隨我迴復·云色屬我，或復我依行中相續·云我在色。皆計度言「死後有相」。如是循環，

有十六相。從此或計畢竟煩惱，畢竟菩提，兩性並驅，各不相觸。由此計度死後有故，墮落外道，惑菩提性。是則名爲第六外道，立五陰中死後有相，心顛倒論。

⊙七計八無相

辛七 死後無相

又三摩中諸善男子，堅凝正心，魔不得便，窮生類本，觀彼幽清常擾動元，於先除滅色受想中生計度者，是人墜入死後無相，發心顛倒。見其色滅，形無所因，觀其想滅，心無所繫，知其受滅，無復連綴。陰性銷散，縱有生理而無受想，與草木同。此質現前猶不可得，死後云何更有諸相？因之勘校死後相無。如是循環，有八無相。從此或計涅槃因果，一切皆空，徒有名字，究竟斷滅。由此計度死後無故，墮落外道，惑菩提性。是則名爲第七外道，立五

陰中死後無相，心顛倒論。

⊙八計八俱非

辛八 死後俱非

又三摩中諸善男子，堅凝正心，魔不得便，窮生類本，觀彼幽清常擾動元，於行存中兼受想滅，雙計有無，自體相破，是人墜入死後俱非，起顛倒論。色受想中見有非有，行遷流內觀無不無，如是循環，窮盡陰界，八俱非相。隨得一緣，皆言死後有相無相。又計諸行性遷訛故，心發通悟，有無俱非，虛實失措。由此計度死後俱非，後際昏瞢無可道故，墮落外道，惑菩提性。是則名爲第八外道，立五陰中死後俱非，心顛倒論。

⊙九計七斷滅

辛九 七斷滅論

又三摩中諸善男子，堅凝正心，魔不得便，窮生類本，觀

彼幽清常擾動元，於後後無生計度者，是人墜入七斷滅論。或計身滅，或欲盡滅，或苦盡滅，或極樂滅，或極捨滅。如是循環，窮盡七際，現前銷滅，滅已無復。由此計度死後斷滅，墮落外道，惑菩提性。是則名為第九外道，立五陰中死後斷滅。心顛倒論。

⑩十計五現涅槃

辛十 五涅槃論

又三摩中諸善男子，堅凝正心，魔不得便；窮生類本，觀彼幽清常擾動元，於後後有生計度者，是人墜入五涅槃論。或以欲界為正轉依，觀見圓明生愛慕故，或以初禪，性無憂故，或以二禪，心無苦故，或以三禪，極悅隨故，或以四禪，苦樂二亡，不受輪迴生滅性故，迷有漏天作無為解，五處安隱為勝淨依。如是循環，五處究竟。由此計度

五現涅槃，墮落外道，惑菩提性。是則名為第十外道，立五陰中五現涅槃。心顛倒論。

⑪三結過勸示

庚三 結誡

阿難！如是十種禪那狂解，皆是行陰用心交互，故現斯悟。眾生頑迷，不自忖量，逢此現前，以迷為解，自言登聖。大安語成，墮無間獄。汝等必須將如來語於我滅後傳示末法，徧令眾生覺了斯義，無令心魔自起深孽。保持覆護，銷息邪見。教其身心開覺真義，於無上道不遭歧岐。勿令心祈得少為足，作大覺王清淨標指。

⑫五明識陰境分三

己五 識陰禪境魔事分三

①一總示陰相分四

庚一 總明

②一結前行陰盡相

阿難！彼善男子修三摩提行陰盡者，諸世間性幽清擾動同分生機，倏然隳裂沈細綱紐。補特伽羅酬業深脈，感應懸絕，

⊙二正明識陰區宇

於涅槃天將大明悟。如雞後鳴，瞻顧東方，已有精色。六根虛靜，無復馳逸。內外湛明，入無所入。深達十方十二種類受命元由。觀由執元，諸類不召，於十方界已獲其同。精色不沈，發現幽祕，此則名為識陰區宇。

⊙三懸示識陰盡相

若於群召已獲同中，銷磨六門，合開成就，見聞通鄰，互用清淨，十方世界及與身心，如吠瑠璃內外明徹，名識陰盡。是人則能超越命濁。

⊙四結示本惟妄想

觀其所由，罔象虛無顛倒妄想，以為其本。

⊙一別明發相分十

庚一 詳辨

⊙一因所因執

阿難當知！是善男子窮諸行空，於識還元，已滅生滅，而於寂滅精妙未圓。能令己身根隔合開，亦與十方諸類通覺，覺知通溘，能入圓元。若於所歸立真常因，生勝解者，是人則墮因所因執，娑毗迦羅所歸冥諦成其伴侶。迷佛菩提，亡失知見。是名第一立所得心，成所歸果。違遠圓通，背涅槃城，生外道種。

⊙二能非能執

阿難！又善男子窮諸行空，已滅生滅，而於寂滅精妙未圓

。若於所歸覽為自體，盡虛空界十二類內所有衆生，皆我身中一類流出；生勝解者，是人則墮能非能執，摩醯首羅現無邊身，成其伴侶。迷佛菩提，亡失知見。是名第二立能為心，成能事果。違遠圓通，背涅槃城，生大慢天我徧圓種。

③三常非常執

又善男子窮諸行空，已滅生滅，而於寂滅精妙未圓。若於所歸有所歸依，自疑身心從彼流出，十方虛空咸其生起，即於都起所宣流地，作真常身無生滅解，在生滅中早計常住，既惑不生，亦迷生滅，安住沈迷生勝解者，是人則墮常非常執，計自在天成其伴侶。迷佛菩提，亡失知見。是名第三立因依心，成妄計果。違遠圓通，背涅槃城，生倒

圓種。

④四知無知執

又善男子窮諸行空，已滅生滅，而於寂滅精妙未圓。若於所知，知徧圓故，因知立解，十方草木皆稱有情，與人無異，草木為人，人死還成十方草樹，無擇徧知，生勝解者，是人則墮知無知執，婆吒，靸尼，執一切覺，成其伴侶。迷佛菩提，亡失知見。是名第四計圓知心，成虛謬果。違遠圓通，背涅槃城，生倒知種。

⑤五生無生執

又善男子窮諸行空，已滅生滅，而於寂滅精妙未圓。若於圓融根互用中已得隨順，便於圓化一切發生，求火光明，樂水清淨，愛風周流，觀塵成就，各各崇事。以此群塵發

作本因。立常住解，是人則墮生無生執，諸迦葉波并婆羅門勤心役身事火崇水求出生死。成其伴侶。迷佛菩提，亡失知見。是名第五計著崇事。迷心從物，立妄求因。求妄冀果。違遠圓通，背涅槃城，生顛化種。

⑥六歸無歸執

又善男子窮諸行空，已滅生滅，而於寂滅精妙未圓。若於圓明計明中虛，非滅群化，以永滅依為所歸依，生勝解者，是人則墮歸無歸執，無想天中諸舜若多成其伴侶。迷佛菩提，亡失知見。是名第六圓虛無心。成空亡果。違遠圓通，背涅槃城，生斷滅種。

⑦七貪非貪執

又善男子窮諸行空，已滅生滅，而於寂滅精妙未圓。若於

圓常。固身常住，同於精圓。長不傾逝，生勝解者，是人則墮貪非貪執，諸阿斯陀求長命者成其伴侶。迷佛菩提，亡失知見。是名第七執著命元。立固妄因趣長勞果。違遠圓通，背涅槃城，生妄延種。

⑧八真無真執

又善男子窮諸行空，已滅生滅，而於寂滅精妙未圓。觀命互通，卻留塵勞，恐其銷盡。便於此際坐蓮華宮，廣化七珍，多增寶媛，恣縱其心，生勝解者，是人則墮真無真執，吒枳迦羅成其伴侶。迷佛菩提，亡失知見。是名第八發邪思因。立熾塵果。違遠圓通，背涅槃城，生天魔種。

⑨九定性聲聞

又善男子窮諸行空，已滅生滅，而於寂滅精妙未圓。於命

明中分別精粗，疏決真偽，因果相酬，唯求感應，背清淨道。所謂見苦、斷集、證滅、修道，居滅已休，更不前進，生勝解者，是人則墮定性聲聞，諸無聞僧，增上慢者，成其伴侶。迷佛菩提，亡失知見。是名第九圓精應心，成趣寂果。違遠圓通，背涅槃城，生纏空種。

⑧十定性緣覺

又善男子窮諸行空，已滅生滅，而於寂滅精妙未圓。若於圓融清淨覺明，發研深妙，即立涅槃而不前進，生勝解者，是人則墮定性辟支，諸緣獨倫不迴心者成其伴侶。迷佛菩提，亡失知見。是名第十圓覺溜心，成湛明果。違遠圓通，背涅槃城，生覺圓明不化圓種。

⑨三斥邪結正^{分一}

庚三 結成^{分一}

⑩一斥邪

辛一 結誠

阿難！如是十種禪那，中途成狂，因依迷惑，於未足中生滿足證，皆是識陰用心交互，故生斯位。衆生頑迷，不自忖量，逢此現前，各以所愛先習迷心，而自休息，將爲畢竟所歸寧地，自言滿足無上菩提。大妄語成，外道邪魔所感業終，墮無間獄。聲聞緣覺，不成增進。

汝等存心秉如來道，將此法門，於我滅後傳示末世，普令衆生覺了斯義，無令見魔自作沈孽。保綏哀救，銷息邪緣。令其身心入佛知見，從始成就，不遭岐路。

⑪二結正

辛二 成功

如是法門，先過去世恒沙劫中微塵如來，乘此心開，得無上道。識陰若盡，則汝現前諸根互用，從互用中能入菩薩

金剛乾慧。圓明精心。於中發化，如淨瑠璃內含寶月。如是乃超十信、十住、十行、十回向、四加行心、菩薩所行金剛十地，等覺圓明，入於如來妙莊嚴海；圓滿菩提，歸無所得。

⑤三結勸欽壽遵修

戊三 歎法門直至菩提
無乏垂憐末世而
勸持咒

此是過去先佛世尊奢摩他中毘婆舍那，覺明分析微細魔事。魔境現前，汝能諳識，心垢洗除。不落邪見。陰魔銷滅，天魔摧碎，大力鬼神褫魄逃逝，魑魅魍魎無復出生。直至菩提，無諸少乏。下劣增進，於大涅槃心不迷悶。

若諸末世愚鈍衆生未識禪那。不知說法。樂修三昧，汝恐同邪。一心勸令持我佛頂陀羅尼咒。若未能誦，寫於禪堂或帶身上，一切諸魔所不能動。汝當恭欽十方如來，究竟修進最後垂範。」

⑥二更斷餘疑分三

乙三 重請重告結歸理
事唯心

①一疑問分三

②一領前法

阿難即從座起，聞佛示誨，頂禮欽奉，憶持無失。於大眾中，重復白佛：

③二騰三問分三

④一問陰本妄想

『如佛所言，五陰相中五種虛妄爲本想心，我等平常未蒙如來微細開示。

㊦二問併銷次第

又此五陰，爲併銷除？爲次第盡？

㊦三問詣何爲界

如是五重，詣何爲界？

㊦三總請答

惟願如來發宣大慈！爲此大衆清明心目！以爲末世一切衆生作將來眼。』

①二答釋^{分二}

㊦一正答所問^{分三}

㊦一廣答陰本妄想^{分三}

㊦一總明

佛告阿難：『精真妙明本覺圓淨，非留死生及諸塵垢，乃至虛空，皆因妄想之所生起。斯元本覺妙明真精，妄以發生諸器世間，如演若多迷頭認影。妄元無因，於妄想中立因緣性，迷因緣者稱爲自然。彼虛空性猶實幻生，因緣自然皆是衆生妄心計度。

阿難！知妄所起，說妄因緣。若妄元無，說妄因緣元無所有。何況不知，推自然者？是故如來與汝發明，五陰本因，同是妄想。

㊦二別示^{分五}

㊦一明色陰惟是堅固妄想

汝體先因父母想生，汝心非想，則不能來想中傳命。如我

先言心想醋味，口中涎生，心想登高，足心酸起。懸崖不有，醋物未來，汝體必非虛妄通倫，口水如何因談醋出？是故當知，汝現色身，名為堅固第一妄想。

⊙二明受陰惟是虛明妄想

即此所說臨高想心，能令汝形真受酸澀，由因受生，能動色體。汝今現前順益違損，二現驅馳，名為虛明第二妄想。

⊙三明想陰惟是融通妄想

由汝念慮，使汝色身。身非念倫，汝身何因隨念所使？種種取像，心生形取，與念相應。寤即想心，寐為諸夢。則汝想念搖動妄情，名為融通第三妄想。

⊙四明行陰惟是幽隱妄想

化理不住，運運密移；甲長髮生，氣銷容皺；日夜相代，會無覺悟。阿難！此若非汝，云何體遷？如必是真，汝何無覺？則汝諸行念念不停，名為幽隱第四妄想。

⊙五明識陰惟是顛倒妄想

又汝精明湛不搖處名恒常者，於身不出見聞覺知。若實精真，不容習妄。何因汝等曾於昔年覩一奇物，經歷年歲，憶忘俱無，於後忽然覆覩前異，記憶宛然曾不遺失？則此精了湛不搖中念念受熏，有何籌算？阿難當知！此湛非真！如急流水，望如恬靜，流急不見，非是無流。若非想元，寧受妄習？非汝六根互用開合，此之妄想無時得滅。故汝現在見聞覺知中串習幾，則湛了內，罔象虛無，第五顛倒微細精想。

庚二結成

阿難！是五受陰，五妄想成。

己二超答詣何爲界

汝今欲知因果淺深，唯色與空是色邊際，唯觸及離是受邊際，唯記與忘是想邊際，唯滅與生是行邊際，湛入合湛，歸識邊際。

己三追答併銷次第

此五陰元重疊生起，生因識有，滅從色除。理則頓悟，乘悟併銷；事非頓除，因次第盡。我已示汝劫波巾結，何所不明。再此詢問？

庚二結勸傳示

汝應將此妄想根元，心得開通，傳示將來末法之中諸修行

者，令識虛妄！深厭自生，知有涅槃，不戀三界。

甲二流通分分二

甲三 經益分

乙一 如來歎述分二

丙一 明滅惡力用

阿難！若復有人，徧滿十方所有虛空盈滿七寶，持以奉上微塵諸佛，承事供養。心無虛度。於意云何？是人以此施佛因緣，得福多不？』

阿難答言：『虛空無盡，珍寶無邊。昔有衆生施佛七錢，捨身猶獲轉輪王位。況復現前虛空既窮，佛土充徧，皆施珍寶。窮劫思議，尚不能及。是福云何更有邊際？』

佛告阿難：『諸佛如來，語無虛妄。若復有人，身具四重。十波羅夷，瞬息即經此方他方阿鼻地獄，乃至窮盡十方

無間靡不經歷；能以一念將此法門於末劫中開示未學，是人罪障。應念銷滅，變其所受地獄苦因。成安樂國。得福超越前之施人。百倍千倍千萬億倍，如是乃至算數譬喻所不能及。

④二明生善力用

阿難！若有衆生能誦此經。能持此咒，如我廣說。窮劫不盡，依我教言。如教行道，直成菩提。無復魔業。』

⑤二大衆歡喜

佛說此經已，比丘、比丘尼、優婆塞、優婆夷，一切世間天人阿修羅，及諸他方菩薩。二乘，聖仙童子，并初發心大力鬼神，皆大歡喜，作禮而去。

大佛頂首楞嚴經 卷十